

## **Donna Ockenden**

Donna Ockenden – 07786 693348  
Donna@donnaockenden.com

11 Gorffennaf 2018

### **Datganiad i'r wasg**

#### **Dim i'w ryddhau tan ar ôl cyflwyniad Donna Ockenden i Fwrdd BIPBC ar 12 Gorffennaf 2018**

**Pennawd:** Bydd adroddiad Ockenden ar drefniadau llywodraethu ar ward Tawel Fan cyn ei chau ym mis Rhagfyr 2013 a threfniadau llywodraethu presennol mewn Gofal Iechyd Meddwl Pobl Hŷn yn BIPBC i'r cyfnod presennol yn cael ei gyhoeddi ddydd Iau 12 Gorffennaf 2018 am 10:30 o'r gloch.

### **Beth yw adolygiad Ockenden?**

Mae adolygiad Ockenden yn adolygiad helaeth a hir yn cynnwys dros ddwy flynedd a hanner o waith manwl yn ymwneud ag ystyried miloedd o ddogfennau, rhai na chyhoeddwyd o'r blaen, a 200 cyfweiliad â staff presennol a chyn staff BIPBC a chynrychiolwyr defnyddwyr gwasanaethau presennol a diweddar ar draws chwe sir Gogledd Cymru.

Roedd ward Tawel Fan yn ward 17 gwely yn Uned Ablett Ysbyty Glan Clwyd. Cyn ei chau, roedd yn ward a ddynodwyd ar gyfer asesu a thrin cleifion dementia. Ar adeg ei chau, dywedodd BIPBC 'nad oedd sicrwydd ar hyn o bryd bod Tawel Fan yn gallu darparu amgylchedd gofal 24/7 sy'n gyson â safonau gofal tosturiol diogel i'r cleifion mwyaf bregus sy'n dioddef o ddementia datblygedig.'

Mae adolygiad Ockenden wedi darganfod bod BIPBC, ers ei greu ym mis Hydref 2009, wedi cael gwybod dro ar ôl tro bod achos pryder sylweddol iawn yn y systemau a phrosesau llywodraethu oedd yn sail i ystod o wasanaethau a ddarparwyd gan BIPBC. Roedd hyn yn cynnwys gofal iechyd meddwl pobl hŷn a gofal pobl hŷn yn gyffredinol. Mor gynnar â 2012 ymlaen, cynhaliwyd ystod o adolygiadau allanol ar BIPBC gan sawl sefydliad. Mae adolygiad Ockenden wedi darganfod bod BIPBC wedi gwneud cynnydd cyfyngedig iawn i fodloni'r argymhellion o'r adolygiadau hyn dros gyfnod maith. Mewn llawer o achosion, roedd yr argymhellion yn cael eu dwyn ymlaen o un adolygiad i'r llall yn unig.

O ddechrau 2013, dywedwyd yn glir iawn wrth BIPBC nad oedd eu ffordd o reoli ac ymchwilio pryderon (digwyddiadau difrifol, cwynion a phethau na ddylent byth ddigwydd) yn addas i bwrpas. Mae'r adborth hwn yn adlewyrchu'r adborth gan gynrychiolwyr defnyddwyr gwasanaethau presennol a diweddar a gymerodd ran yn

adolygiad Ockenden. Ynghyd â materion eraill, arweiniodd hyn i BIPBC gael ei roi dan 'Fesurau Arbennig' gan Lywodraeth Cymru ym mis Mehefin 2015. Maen nhw'n parhau mewn 'Mesurau Arbennig' hyd heddiw.

Mae adolygiad Ockenden wedi darganfod bod BIPBC wedi cael gwybod dro ar ôl tro am yr un pryderon am staffio meddygol a nyrsio, dogfennaeth, diogelu oedolion bregus, materion diogelwch yn yr ystâd, hyfforddi a gwerthuso staff, nifer gwelyau a rheoli gwelyau. Datblygwyd cynlluniau gweithredu'n aml yn dilyn adolygiadau allanol ac ymchwiliadau gan HIW. Ond mor ddiweddar â diwedd 2017, gwelwyd nad oedd camau a addawyd yn dilyn adolygiadau ac ymchwiliadau o flynyddoedd a fu, wedi cael eu cynnal gan BIPBC. Pan fo cynnydd wedi'i wneud dros yr 8 mlynedd diwethaf, mae wedi bod yn rhy araf ac nid yw eto'n gynladwy.

Mae llawer o adolygiadau ac ymchwiliadau allanol o 2009 hyd heddiw a defnyddwyd gwasanaethau presennol a diweddar yn sôn yn bositif am ymrwymiad staff clinigol rheng flaen BIPBC. Soniodd y staff rheng flaen mewn Gwasanaethau Iechyd Meddwl Pobl Hŷn y siaradwyd â nhw drwy gydol yr adolygiad, yn gyson am bryderon sylweddol am lefelau staffio a diffyg ymgysylltu â'r Bwrdd a'r tîm uwch reoli mewn iechyd meddwl ac mae hyn yn sail i un o'r llawer o argymhellion yn adroddiad Ockenden.

Mae bellach yn gwbl hanfodol bod BIPBC fel sefydliad, dan arweiniad Bwrdd BIPBC yn gwneud y cynnydd gofynnol ac angenrheidiol gydag argymhellion Ockenden wrth symud ymlaen. Pan fydd argymhellion adroddiad Ockenden wedi cael eu rhoi ar waith, byddant yn gwella gwasanaethau i bobl hŷn bregus ac yn cefnogi gwella'r amgylchedd gwaith i'r llawer o staff sy'n rhan o ddarparu gofal clinigol rheng flaen ledled iechyd meddwl. Mae'n rhaid i Fwrdd BIPBC gydio yn y cyfle y mae argymhellion adroddiad Ockenden yn ei roi iddynt a sicrhau bod yr argymhellion yn cael eu bodloni yn yr amserlen a nodir yn glir yn yr adroddiad.

I grynhoi, dywedodd Donna Ockenden, 'Rwyf wedi adolygu llywodraethu ar draws Iechyd Meddwl Pobl Hŷn o 2009 hyd heddiw. Rwyf wedi darganfod bod y systemau, strwythurau a phrosesau llywodraethu, rheoli ac arwain a gyflwynwyd gan Fwrdd BIPBC o 2009 yn hollol amhriodol, gyda diffygion sylweddol. Cafodd Bwrdd BIPBC wybod am y diffygion sylweddol hyn, yn fewnol ac allanol am lawer o flynyddoedd cyn i gamau ddechrau cael eu cymryd. Pan fo cynnydd wedi'i wneud, mae wedi bod yn rhy araf. Rwyf yn gobeithio y gall yr adroddiad hwn helpu i gyflymu'r gwelliannau y mae poblogaeth a staff BIPBC yn eu haeddu.

'Cyflwynais fy adroddiad i Fwrdd BIPBC heddiw a chlywais farn aelodau'r Bwrdd am y cynnydd sydd ar y gweill. Rwyf yn teimlo fod y Bwrdd bellach yn deall arwyddocâd y daith heriol sy'n eu hwynebu ac rwyf yn gobeithio y bydd yr argymhellion a wnaed yn fy adroddiad yn eu helpu i gyflymu'r daith honno.'